



En derby ladin dals mile emoziuns chël sughé l'ultim fin dl'edma sön le ciamp „Pradel“ a San Martin.

La Val incunta indo do valgügn agn la formaziun dl'ACD Val Badia che se presentëia dal mëtëman te ciamp plö determinà y cun la iüsta agresivité por fa garaté la devënta. Al bel publich rové adalerch i él gnü pité na partida plajora y interessanta cina le sciür dla fin.

Sciöche bel anuzé é la formaziun de ciasa che pëia ia cun sbunf y à ince les prömes ocajiuns da segné sön deplö trates dal ciantun. Fora dl mumënt por la Val Badia é l'arbiter che conzed la mascima puniziun por en fal de man evidënt amesa area. Alex E. se presentëia sigü ala trata y porta in vantaje la squadra. Püc menüc de ligrëza por i ghesc, che subësc inant la presciun de ciasa y insciö tosc la parité. Al 30^a menüt röia Alex S. sú sön la passaja amez y pro la trata te

porta, chiló é Sepl bun de paré mo le palé rebatü vëgn ciamó n iade trat cuntra porta dal medemo sogadú, che ti garetà ince por le 1 a 1. Nianca le tēmp da festejé che Matthias S. rōia sú cuntra porta y vëgn contrasté dan la trata, l'arbiter ne sighita nia y mostra le punt di ònescmetri. Le medemo atacant trasformëia cun segurté por le vantaje dla Val Badia. I sogadus da La Val, nia posizionà a dërt post, mëss se paré dal jüch asvelt di padruns de ciasa che rōia scialdi por prüms sön le palé y la partësc fora cun velocitè.

Le prüm tēmp se stlùj jö sön le resultat de 2 a 1 por la Val Badia.

Tla secunda pert vega l'alenadù Hilber na mudaziun drastica tla formaziun da La Val, che porta atira sù früc. I ghesch rōia te ciamp ciarià de forza y se posizionëia a dovëi te ciamp. Al 60[^] é la crossada amez perfeta por Michele che vëgn indere contrasté dal'un dla Val Badia, le mandl fosch conzed la terza trata dal ònescmetri. Le bun reflex dl portier Renè tēgn sö la trata de Alex E., chësc ultim é impó asvelt por rové sön le palé rebatü por apogé te porta. Püc menüc plö tert pëia ia na bela aziun dala pert ciampa cun Franz che ciafa le trü lëde da na pert jö y mët amez na passaja bassa por Michele, che rōia cun sbunf da ia dô y canonëia cuntra porta por le vantaje. Al 68[^] é la passaja dal mezciamp che taia fora la defenjiun y rōia al medemo Michele, cun dezijiun y sú dan le portier prôl en mez palonët che ti garetà ince por súa doplëta personala. Tl'ultima cherd'ora se alza ciamó la Val Badia por ciaré de avarié le resultat, al 80[^] pëia ia na gran trata al limit che rebat cuntra la stangia de porta y passa fora l'area. Impó combat inant La Val y cun le sciür dla fin se concretisëia la devënta. La Val à anuzé bun les ocajiuns da gol costruides y te n cört tēmp ti era garatada da rosedé de plëgn le resultat.

Val Badia □ – La Val : 2-4

Formaziun La Val: 1. Sepl Kantioler, 2. Luca Pescollderung (dal 55[^] Alexander Miribung), 3. Werner Sottara, 4. Paolo Vallazza, 5. Christian Dapoz, 6. Franz Tolpeit, 7. Michele Campeï (dal 85[^] Egon Frenes), 8. Max Nagler (dal 30[^] Marco Sottara), 9. Samuel Winkler (dal 75[^] Felix Nagler), 10. Stefan Sottara - capitan, 11. Alex Elzenbaumer

Goi por La Val: Alex Elzenbaumer (18[^] y 60[^]), Michele Campeï (62[^] y 66[^])

Proscima partida: *In dumënia ai 29 de otober dales 14:30 te ciasa cuntra le Mareo.*

Atri resultac:

- Juniores: Mareo/La Val – Hochpustertal : 5 - 1
- U-15: La Val – Untereisacktal: 0 - 10
- U-12: La Val – Team 4 cöce: 1 – 1
- Altherren (Copa Provinzia): Latzfons – La Val: 1-2